

معلومة كنسية

ألقاب العدرا

✍ خدام مدرسة مار إفرام السرياني

أمنا العدرا ليها مكانة كبيرة جداً و لها ألقاب كثير ... تعالوا نشوف أهقها



أمنا العدرا هي أعظم قديسة في البشرية كلها .. هي اللي اختارها ربنا و اتولد منها عشان يفدينا و يخلصنا .. فيه شرف أكثر من كده ممكن حد يناله؟ و بالتالي مفيش أقدر من الإنسانية اللي نالت الشرف ده .. تعالوا نشوف أهم 10 ألقاب للعدرا مريم و سبب تسميتها بهم.

1 - الثيئوتوكوس (والدة الإله):

ده أهم لقب للعدرا خصوصاً من ناحية عقيدتنا و إيماننا .. و عشان كده بنقوله في مقدمة قانون الإيمان .. و معناه إن العدرا ولدت الله الظاهر في الجسد

2 - أم النور:

و ده أشهر لقب للعدرا و بنقوله برضه في قانون الإيمان .. لأنها ولدت النور الحقيقي الذي ينير لكل إنسان

3 - الحمامة الحسنة:

(تي اتشيرومبي إثنيسوس) و ده برضه من أشهر الألقاب و بنقوله في معظم مدايح و ألحان العدرا .. زي لحن "شيري ني ماريا" اللي بيتقال في التسبحة .. زي الحمامة اللي جابت غصن الزيتون (رمز السلام) لنوح في الفلك .. و كمان الحمامة ترمز للبساطة و الطهارة (كونوا بسطاء كالحمائم)

4 - الملكة:

اللي تنبأ عنها داود في مزمور 45: "قامت الملكة عن يمينك أيها الملك" .. و دي بنقولها في ذكولوجية العذراء في رفع بخور عشية .. و العدرا دايماً في الأيقونات مكانها على يمين المسيح (راجع معلومة حامل الأيقونات)

5 - المعجزة الذهب:

و ده اللي بنقوله في لحن "تي شوري" .. لأن الشورية اللي جواها الجمر المشتعل من غير ما تتحرق بترمز لأمنا العدرا (راجع معلومة الشورية)

6 - السماء الثانية:

و ده بنقوله في ترنيمة "طوباكي يا مريم" .. لأن السماء مسكن الله .. و أثناء الحمل المقدس كانت العدرا مسكن الله

7 – مدينة الله (أو مدينة الملك العظيم):

لأنها اللي قصدها داود في مزمر 86: "أعمال مجيدة قد قيلت عنك يا مدينة الله" .. و اللقب ده إحنا بنقوله في لحن "بي أويك" لما بنقول: " لأنهم تكلموا من أجلك بأعمال كريمة أيتها المدينة المقدسة التى للملك العظيم"

8 – الكرمة:

زي ما بنقول في قِطْع الساعة الثالثة: "أيتها الكرمة الحقيقية الحاملة عنقود الحياة"

9 – العليقة:

لأن العليقة ترمز للعدرا .. و دي بنقولها في مديحة "العليقة" في شهر كيهك

10 – العروس:

اللي اختارها الملك السماوي .. راجع مزمر 84 (فاض قلبي بكلام صالح ...) اللي بيقول فيه "كل مجد ابنة الملك من داخل" ... و الحتة دي بنقول جزء منها في طقس الإكليل

و لها ألقاب تانية كتير (زي عصا هارون و قبة موسى و سلّم يعقوب) .. عايزين ندوّر و نفهم سبب الألقاب دي .. و نضمن و نفرح إن لينا أم بالعظمة دي بتشفع فينا في كل حين